

處實堂集

慶實堂後集序

王孝伯有言名士不必多



得時常

無事痛飲酒熟讀離騷便可稱名士不

知者以此言為解嘲知者則以為謗腹

若矣夫有高世之名定有範世之行有

遺世之見必有用世之真安有名士而

僅以名為也余令茂苑得交伯起先生
先生於學無所不窺注精六藝旁覽百
家有境必窮有義必了不特捐資史腐
令而擷其精即商瞿于臂毛魯壁蝕之
餘無不冥心而會其微故下筆言語妙
天下而海內亦視其片語隻字為流珠

結璘然先生孝友淳至質言質行居恒
以朴茂自持力挽時俗趾蕩之風中年
絕意軒輊進而一切牢騷憤激之態夷
然不入其肺腑余嘗論孟襄陽南山救
廬儘足自適何必北闕哉不才明主棄
多病故人疎一腔熱腸情見乎辭矣先

生以三吳高士監司臺使無不脩式廬
之敬後先薦辟者幾矣而先生竟堅卧
不應余每造之蕭然四壁都無長物清
談移晷終無雜言昔人所稱窺其戶聞
然無人披其幃其人斯在先生足當之
潛龍養志於埋首冥鴻徵用于可儀令

天下知處士非盜虛名者先生有以示
之的矣先生於嘉隆間已有處實堂集
行於世此其績也境則轉造而近語則
轉造而夷即景肖物則轉造而真所謂
絢爛之極歸于平淡人工之至乃近自
然安得文章老自神其先生之謂乎

庚戌春日茂苑舊令山陰祁承燦序於
善果寺之僧舍

後學陳元素書

慶寶堂後集目錄

第一卷

年弟吳西葉初春校刻

賦

五言古

七言古

五言律

五言排律

第二卷

從姪日觀張文奇校刻

七言律

七言排律

第三卷

同門筆山劉弘道

校刻

年家具茨毛

堪

五言絕

七言絕

詞

第四卷

年家仲容徐

列校刻

書

啟

序

第五卷

通家天虞劉軋明

年侄瓊華俞琬綸校刻

記論傳贊題跋

第六卷

通家蓉江史國書校刻

祭文誄墓志碑行狀

姻家龍華王坤

從姪太液張文彥通校

目錄

虎實堂後集卷之一

長洲張鳳翼伯起著

賦

自壽賦

有序

丙午之歲予年已八十矣私計所享皆爲僭踰不敢當諸君子之贈元旦即辭諸門惟述所感以自壽云

稽箕疇之所先兮訝匪德而獲福省提躬之有疚兮胡天眷之我屬豈介福之可倖兮抑小善而蒙錄追古昔之所艱兮感增厚而內慙歎伯道之無兒兮痛長庚之莫祀雖中郎惟有女兮嗟自傳之無子予始憂于嗣續兮幸商瞿

之竊比何意舉茲三雛兮藉書香之有寄旣桂子之竝峙
兮暨桐孫之蕃只願二方之稱難兮祈五常之競美至修
短之靡常兮非人謀之可期誼賦鵬而不延兮玠玉潤而
夙萎奚松柏之先彫兮等蒲柳之早衰顧雞肋之孱弱兮
方競競以自危廼善病以致警兮延犬馬於隴眉慕武公
而未逮兮較井伯而已踰將益堅而益壯兮倣伏波之良
規惟城意而瓶口兮期鄭公之我師固飲河而鼠滿兮亦
聽冰而狐疑且虛名之損真兮尤造物之所忌即名實之
未浮兮亦智者之所避矧空空其無知兮懼過情之爲累
謂納交以要譽兮寔踽踽其罔比無魏勃之掃門兮稅正

平之懷刺聲胡溢於四方兮名何逮于三事愧仲御之逝
名兮慚伯休之隱市中餬口于剖劂兮步劉梁之鬻書時
操觚以代卜兮亦消閒以自娛敢浮慕夫名高兮寄孤標
于潛夫雖沒世其不稱兮吾亦當安吾之愚哂則足而泣
玉兮諂剖玉匪盟鷗而觀海兮豈待兔而守株堂
處實而請事兮表觀空而庶幾數外竒而內偶兮戰陰肥
而陽癯蔬則烹而若膏兮衣雖敝而等狐惟一枝其可息
兮與鷦鷯而爲徒甘舍豐而居嗇兮寧辭榮而守枯審安
常之免戾兮識越分之爲辜諒捷徑之終遐兮徵遵道之
非迂滌徃遭之窮轍兮信末路之通衢任性天以從容兮

泯吾道之隆污漫揮戈以返日兮且擊壤而歌唐虞歌曰
皓首視履虧考祥鄉曲月旦何敢當社叨永錫壽而康固
知鷄息亦鷹揚石田菑畚樂未央樗散詎堪棟明堂遠志
在山自無疆

攀戀賦

有序

大中丞豫章周公之開府東南也恩湛百城碑鐫萬口固
尤膜之甘霖懷襄之寶筏也富宁鑒公之勤宣晉秩督
河福星欲移借寇未果下走沐國士之遇情倍于衆乃作
斯賦用寄卑衷辭曰

聖姬旦之雲仍兮布枝葉于洪都誕嘉辰以生申兮毓奎

壁之靈符蚤對揚于彤廷兮肩金閨之訐謨冠柱後之惠
文兮効獻替于青蒲秉文衡于三輔兮羅英才于敬敷登
崇階于九列兮貳夏侯之修轍奚罔政之久稽兮司銀臺
之喉舌惟留都之重地兮乃簡在令撫綏慨升車以攬轡
兮諒夏陽之可齊方天澤之未布兮禱桑林與舞雩冒赤
日而徒行兮忽回天而雨施迨戊年之病桑兮舞商羊而
爲災虔焦勞而懇祀兮肅躬修而心齋感玄蒼而霽威兮
掃浹旬之沉霾隨抗䟽以叩闥兮啟王心之我哀致溫
詔之下頒兮渝永霜而冬日雖天恩之無涯兮寔公仁
之兼恤融沍寒以陽和兮培蘭茝而去棘剪奸渠而惠養

兮卧閭闔于在席諒網舉而目張兮允平康而正直美譽
命之上逮兮斯鳴鳩之是陟宜湯仁于不匱兮期禹績之
將及計膏輪而命駕兮將移民之所天兢匍匐以籲天兮
與離照之我憐卽山谷之野老兮願申曝于一錢遷怙恃
將他適兮胡視聽之弗祐也豈將廣南薰之解愠兮匪吾
土之獨厚也追疇昔之召對兮扶蹇駕于皇皇之堂蒙折
節以下濟兮仰讓德之尊光承吉辭以俯詢兮披椒桂之
餘芳視山樗若積幹兮擬側陋之明揚惜雖老之東之兮
憫龐眉之馮唐詎傳經之有申兮抑結襪之惟王豈監門
之侯嬴兮庶薤水之任棠將葑菲之是采兮思下體之有

妨甘曳尾於泥塗兮豈井渫之不食敢妄覲於平仲兮冀
脫驂于越石佩智瑩之寔出兮惟沒齒而啣德日扶筇以
擊壤兮和歌謠于不億謠曰

帝簡姬公庇半天旱爲甘霖水桑田奸頑歛跡柔淑全兆
民賴之軀命延頓令夏周難爲前胡然新綸督河源欲借
不可涕泗漣雲帆搖搖自登僊攀望渴饑空再涎

蒙毀賦

何斯民之直道兮垂三王之故武方狂瀾之汎濫兮懼餘
波之及我胡含沙而蜮射兮玷青蠅于太素羗肆譎于貪
狼兮致市中之有虎乃曾參之殺人兮遂投杼于慈母觀

奚舍乎靈龜兮鵠何羨乎腐鼠惘惘淪乎涇渭兮亦翻覆
乎雲雨些杜蘭之爲猶兮謂橘柚可變枳倫三娶之皆孤
兮撻何及乎婦翁汚不疑以盜嫂兮曾不問其無兄責蒼
苴于馬援兮疑不利于周公詎混濁之見清兮辨衆醉于
獨醒豈五月而披裘兮取遺金以自媵謂標吏而奪金兮
乃揮鋤之管寧指殘形之高行兮倚市門而獻笑詆露筋
之守貞兮雖耆齡而莫保嗟生平之潔修兮亦硜硜以自
好顧不理於讒口兮惟反躬以自考念非道與非義兮曾
何營而何求豈幽畏乎鬼責兮乃明戾乎人謀遵龍門之
無辨兮祈兢兢以自修任我仇之有疾兮乃禦寒之重裘

欣逝名之得計兮卽銷聲而奚憂惟衾影之無媿兮又何
心于怨尤

缶歌館賦

予之不托於歌也久矣客有疑而問焉曰子之以缶歌名
館也將謂如張暢之少好音律老而始解實音顧曲始終
弗怠固宜洋洋盈耳者嫋嫋不絕矣何及門而倏乎其音
入室而杳乎其聲其名館也奚爲稱情予曰然然否否始
予之好歌也不啻暢若也故聲伎之所褰裳而處度曲之
侶駢肩而語爲忘疲之公子爲趨羶之傖父興儂于擊節
情孰乎按譜今也不然頓改乎素勿曰無恒亦有其故昔

之洋洋今之靡靡家珍巴渝人推下里卜晝則怒卜夜則
喜于夜方來朝歌未已彼自矜其若斯吾胡樂乎茲美又
何恠乎非續而塞聰無讓而洗耳且吾之館猶夫昔也館
之名未常易也昔也以聲今也以精夏涼蟬響春和鳥鳴
蟋蟀吟秋霜天雁驚何物非缶何歌不生任無心之唱和
隨自至之咸英謝人謀於寂若收天籟於忘情何必爲正
音之師曠何必爲辨霓之王生何必徵古調於綵駒何必
選妙唱於秦青但融律呂於五內卽奏簫韶於九成客曰
允若茲子之歌進於道矣吾亦因子而耳順于希聲之天
矣

五言古

對月

薄暮客俱散月來成主賓乃知李白語顧影成三人徘徊
明月下轉覺形影親月落已無影孑然惟有身解衣就枕
卧陶然全天真始知宇宙間尚有無懷民

自述

百年能幾何萬事吾已足跡雖似離群心不恨幽獨朝于
一編對夕同諸孫浴陶然三五杯自向空齋宿

郭郡公大父還金述

薄俗射厚利取與多自私驢背道傍金知爲誰者遺半千

豈不饒足充素封貲第使得者喜將令失者悲義士戒臨
財非墜懲柔願追跡喚醉人醒方泣路岐訊金出官帑將
不免綫纍出橐示斯人亡金還在斯揮鋤若幼安償金等
不疑天與顧不取甘爲里閭嗤食貧素所諳分酬應固辭
營營彼胡爲冥冥寔鑒之陵阜况遐齡仄飈綿宗支祐篤
子若孫甲第輝門楣願言八郡乘須令後人知

金粟失扇唁之

美人贈君扇清風憐舊雨旣障元規塵亦祛三伏暑視作
掌中珠忽爲牖上屢盜壁虛疑張巨羅寔歸祖金氣終變
商銀杯從化羽安得東方生還來卜窶數屏後乏鸚鵡簪

前少鸚鵡人云人得之無勞復云楚

題陸叔平效陳所南蘭花

所南喜画蘭不過二三筆孤標寓毫端清勁竟誰匹求者
多不與不求或可得點染方寸間聲價千金值叔平摹前
哲摹擬出胸臆虎賁作中郎典刑應無數異世亦相感不
獨在翰墨

讀史四首

秦城萬里長楚越鄉蒙恬非地脉項羽豈天亡禦寒
須重裘止謗惟自修衆口任鑠金多福由自求

圍入芊邦奔呂成羸祚非江東牛易馬千載同此機枝頭

化枳橘巢中徒翼飛天意固潛伏人謀空錯違

糟糠不下堂貧賤不可忘貞賢若宋弘安能尚湖陽知臣
莫若君片言識臣心惜哉郭后廢關雎竟銷沉考叔念厥
母觸龍愛少子諷諫古所尚弘意殆若此旣已貴易妻且
將富易交所以桐江上炯炯客星高

昔人務寔勝寔大聲亦均今人事表暴倏若形影分須知
草玄者亦以膏自焚何如披裘叟獨釣桐江濱亂固不辱
已治亦不事君銷聲惟所適千載流芳芬

天台山

我聞天台山一萬八千丈想像峯巒高應出青天上又云

山之趾周圍八百里欲知路從入當因福溪水玉關與瓊樓后梁秘丹丘試讀興公賦亦可作神遊

贈王君之

之子方外士偶爾在人間雖有烈士心而無遊子顏朝隨山雲出夕逐飛鳥還三徑未全蕪一室聊悟言

古意

南天煽熒惑北陸深塗泥西方鬼晨嘯東家鵝夜啼空林自搔首機事嗟噬臍弱草偃狂飈驚馬蹶霜啼叩闥計罔聞金穴下成蹊孰使威者踈孰令合者睽孰謂詐者忠孰俾行者迷世路總昏黑胡能然青藜宋人問生犢胡天惟

收瓶局翻清黑白廐際混黃驪不焚紫羅囊愁聞白銅甃
長夜如可旦行當鳴天鷄

遲歸誠

女生願家室多擬求良匹寧知二十嫁此禮殊可憐老大
守空房不售待何日必如宋之子蹇修稱艱得東家十六
女有子抱乳食西鄰三十婦兒女當門戶而我獨愆期青
春時向隅標梅豈無時委禽豈無徒強欲占和鳴多爲卜
者誣將謂怨女計無乃賢父愚衛青可尚主黃霸亦娶巫
何必玉鏡臺方許適老奴女命有厚薄從夫有榮枯定婚
有天數豈容女擇夫我昔嫁二息中道皆寡居若云慎厥

初壽夭固茫如世間幾何人富貴且壽考安得若而人使之與偕老寧知閨中秀倏忽成枯槁及今猶未晚母令悔不早

聞沈季學綱有子子叙戲作

予昔愛沈甥妍心寢其貌宛然一蟾蜍對鏡亦自笑應從劉海遊仙去不待老聞今有遺孤咲貌亦相肖何不來謁予風前一絕倒

懷古

時序有代謝風流無今古誰謂千載人惟存一坏土讓皇文其身延陵繩厥武緬懷向誰陳臨風淚如雨

嚴子陵

新莽昔篡漢子陵應避亂光武旣中興自當求子陵子陵不肯起猶釣桐江水雲臺已塵埃千秋餘釣臺

雨夜齒痛

生憎張儀舌毒流范睢齒反側到天明空窓惟雨聲
積雨自遣

鳴鳩時拂羽無異商羊舞何處可陶情藂林惟水聲

賦得嘯溪贈劉生

遐哉劉越石登樓發清嘯千秋啟雲仍繩武乃惟肖時傳鸞鳳音不獨魚龍釣安得成公綏作賦凌同調

送王太王會試

吾吳英賢數鄒魯出其後須知縫掖士不數雁門守一朝
試留都才華燦星斗登俊旣揚眉較藝多斂手旣先冀北
群還酣鹿鳴酒掛席乘長風計期綰珪綬卽看曲江花春
明帝城柳

題林泉椿桂圖贈許封公

芳園茂嘉樹鬱然桂與椿八千爲春秋三五暎月輪修齡
比貞固幽姿象清真無論令旌陽仙脉何振振五經號無
雙祐故徵後人奏頌不加點似令神雀馴闕下起鳬鳥庭
前成鳳麟須知錫難老奕葉脩長春

婁敬

嗟嗟婁氏子奇謀効和親後母亦可妻甥舅何足倫乃於
璫裘俗責以渭陽姻羈縻濟日下戰守胡不陳

謝靈運

淮肥秦奇績奕葉貽孫謀繩武豈不賢易世事冥搜白社
已見却赤族遭虐劉千載若而人相將効顰羞世祿若無
厭禮義鮮克由倒屣葉公龍那知海中鷗罔遵伏波戒攘
臂營邊猷椎結難與言款順殊謬悠終焉辱君命鼠竄先
捧頭三木雖幸脫五等何足收

送陸掌教計偕北上

四姓推平原機雲開其先遙遙衍華冒雲仍繼芳妍弱冠
奏文賦鄉書并群賢固應搏霄翺翺薄雲天胡爲九萬
程一息經數年似老豫章材清廟儲勤宣津亭望仙舟長
河片帆懸卞玉晚見妝所期錫金蓮東壁方流輝帝座若
叅前龍頭會有屬毋令健者專

壽王節母袁太夫人公輿侍御授簡

憶昔燕南州詵詵感麟趾翩翩推象賢譙譙卜君子瞻茲
玉潤明且爲永清喜一朝籍修文坤貞表中軌胎教育遺
孤鏡臺玉容毀殘妝去膏沐襟裾絕純綺擁樹勞顧復然
慕課經史能九發馨兒龍門登佳士箕裘培遺謨奕葉仍

前社祖武豈獨繩母節光千祀朱明啟壽域寶婺輝庭址
令節應先旌綸封自茲始頽情媿代庖蕪辭應直指

劇孟

昔人推俠烈劇孟稱博徒一諾輕千金緩急人所趨廣柳
生季布乘傳安亞夫今人市于博笑談言有無酒食示交
歡機械成穿窬寧知滅耳校惟耽藏腹珠

挽張都諫

崑產自純璧出山爲珪璋剖竹化新建起草鳴朝陽羽翼
奠前星衾影肅秋霜澤枯酬心許恤孤慰琴亡一朝徵死
孝梁木摧明堂豈惟祀俎豆竹帛流芬芳

貧

願言貧可樂無怨已稱難不嫌鶉百結先憂食一簞匪敢
賦無衣何以勸加餐往事多可尤責躬聊自寬

南陔堂

之子事二人名堂米詩章鞠育恩固極承顏樂未央俎豆
服慈訓詩禮叙義方三祭進甘毳五味慎先嘗養志期紹
曾溫扇欲同黃堂構克負荷弓裘矢傳芳烈祖貽孫謀願
言久無忘嚴君齊眉壽日夕祝無疆烏哺雖至情鵬搏卜
名揚及時勸宜懷永爲奕葉光

墻東別墅八詠

忍草堂

傳聞雪山嶺是生忍辱草意蘊舒金輪慧雲護天藻結宇
疏靈壤嘉名寄玄奧歲請陳公藝書紳以爲寶

霜鶴軒

青女飛遙空胎禽侶怡泊豈必丁今歲千秋問城郭前軒
奉嚴君仙瓢日酬酢不羨岳陽樓乘雲駕黃鶴

紫茸菴

有卉產陽羨開花先百草蟹眼煮沙鐺棋鎗發香早負筐
勤採摘採幽歷窮島何似精廬側枝柯擅家寶

竹雪山居

飛雲翳寒林叢篁挺冬節封枝鎖歲蕤翠映轉明澈遲迴
威鳳遊恍惚白猿挈試讀畫竹詩毋令冰夜結

春鶯榭

玄賞乘清夜鶯峰臨雁堂出谷流金衣恍見舍利九檀林
飛瑞彩慧土匪殊方身疑登春臺滿耳聞鶯簧

韻閣

周環茂叢林清陰滿重屋渾疑藻賦成擲地作金玉依稀
發天籟傳聲出空谷無俟燕嘉賓呦呦聽鳴鹿

雨香阜

東臯試登陟南畝時雨清嘯遶蘇門農歌和田父騁望

何穰穰禾黍日
靡靡汙斜應滿車
臨風一揮塵

蘆漪

徙倚蘆之漪
振衣望前浦
想像蘆中人
依稀見漁父
寧知漁者子
扣撓存鄭土
休徵祈三節
英標自千古

陳明府考績膺封

昔侯宰吳邑
顧復遍桑梓
推賢轉錫山
若保幸孔邇
恩波日洋溢
誰云隔一水
考成及瓜期
飛章褒視履
巽命計日申
勅稱慈顏喜
問年慚麥丘
自知應頒侯
耳熱太母賢
無俟徵傍州
俎豆表慈訓
松筠賡栢舟
豈獨享榮封
且以樹貞猷
雲容正神王
海屋方添籌
萱陰茂北堂
萸香薦尚秋

雞鳳超河東麟趾紹箕裘傳書侯三鳥扶輿安八駟銓衡
擇清要侯方陟廊廟列邑欲借難無緣緩恩詔

送范東生自滇入蜀

束裝欲何之西南天一方擔簦訪高密掃門謁平陽田疇
足禾黍尊鱸美江鄉豈不戀桑梓久要不能忘修輪遵滇
池回橈下瞿塘契濶酬下榻攬結充行囊此日歌驅駒長
風羨寒裳感述祈招篇千金慎垂堂

元日試筆戲效長慶體

今年八十六在我當知足人富我不貧人榮我無辱承顏
有子孫應門有僮僕雖然似枯禪長齋足梁肉內省豈無

五
一
一四
疾自訟將奚贖修行持一心庶幾享五福

送劉伯健北上

春陽挂征帆桃李同芳菲惜別更憐才臨岐重牽衣須知
扶搖翮耻逐鷦鷯飛不爭鴛鴦路一感排金扉週知鼓朱
絃和風拂金徽古調雖寡和母謂知音稀背城試一決笑
解白登圍握管超雲霞臨文吐珠璣風生七星劍雲擁交
龍旆始知後來秀益倍前人輝

題乞米冊

十萬八千僧幾人能荷鋤人人要吃飯甌窶須滿車豈但
當滿車須化恒河沙若有許多米宜先給農家

七言古

行路難

君不見張陳昔日未遇時里門躡足令受笞一朝鉅鹿不能救斷金倏忽成狐疑又不見鴻門開燕列尊俎漢人持盾楚人舞漢人已捐用間金楚國安能容亞父相信在心自昔難黃金何足堅交歡漫說風濤起湖海眼前方寸成波瀾丁丁伐木應三復須信彈冠合挂冠

却卿節孝歌

有叙

夫一處一生可以明節或出或處可以徵孝度斷髮以表心參北向而涕泣良有以也觀于任氏之爲妻郝烈之爲

子有足多者故爲作卽卽節孝歌云

昔聞魯連却帝秦又聞李同能救趙何如節孝出清門令
聞同傳土風好任翁有女方及笄碧梧一枝宜鳳樓三星
在戶諧鳳卜六月一息占雲梯一夕悲歡若反掌霜風入
幃杳靈爽驚孤不忍舞青菱雉經寧辭共黃壤倉皇救解
猶賴姑溫言慰藉屬遺孤天全節烈幸無恙劍擁遺孤仍
向隅晨夕勤劬事紡績煢煢俯仰資衣食蓬樞生計惟一
身啼號幸免伊誰力待得遺孤就外傳供師不惜捐刀布
慈孝相持泣推食猶能經紀完婚娶三遷教立兒早成最
之獻賦揚親名兒方戀母不忍去願安韋布薄簪纓簪纓

韋布何足較須信仁親以爲寶但知入室奉金護何必出
山爲小草便便經筭表里中及門桃李醉春風有時濟濟
大都授登堂拜母羅豪雄百金拾遺孰云寡還如五月披
裘者幼安揮鋤千載人夫君一日同聲價天心福善亦可
知方來朱綬發璫枝會見絲綸表節孝同登郡乘遺貞規

四皓羽翼歌

一從仗策入函關千載勲名指顧間只合遠從赤松子何
勞畫策聘商山不韋昔篡秦王處此日陰謀復基呂商山
老人胡爲來不知爲漢還爲楚子房本欲報韓讐韓讐已
報萬事周須知保身明且哲試看心事在封留

菊逸篇投贈

齊女城高俯阡陌城隅一曲幽人宅花光何必繩河陽逸
興還須似彭澤西望無論紫氣來東籬自愛黃金色知君
家世本素封不嫌中道替鳴鐘年來小試計然術心勞杼
軸勤王供論交莫題翟公門客至還傾北海樽桃李不言
蓼菊放榮枯何必問乾坤

閒坐

有事方知無事樂閑時轉覺忙時惡無事且焚香今朝幸
不忙

吳民謠

昔日吳中稱樂土今日吳民淚如雨
機杼俱因稅務空瘡痍總爲催租苦
滿城燈火肅夜巡盜賊轉多民轉貧
謾說倉中官糶米弊生米不到貧民

題柯九思臨北苑春山圖

丹丘昔摹北苑筆神彩煥發無難識
一朝忽遇郭道人廣本裝潢售馬骨
漫言黃金可作臺眼前千里猶嘶檝
優孟登場叔敖廢虎賁入座中郎黜
嗟嗟真僞孰辨之自合珍
藏十重襲

崆峒行贈蕭征西季馨

崆峒山高雲作梯梯雲倚劒蕭征西
征西將軍早樹立勲

名直與雲山齊疇昔芸牕理章句蛟龍筆研生烟霧叩角
耻爲短布歌驕胡羞獻長楊賦蹉跎夜光嗟暗投投筆應
爲定遠侯匹馬衝風曉乘障黃沙一望邊城秋一朝鼙鼓
動西夏連營接徽若解瓦挺身擐甲撾鋒鏑誰云鄼侯無
汗馬軍中惟聞刁斗鳴帳下不聞歌舞聲萬衆從戎不言
苦將軍與爾同死生九重酬功何所有玉勒青驄紫絲綬
腰橫寶帶色凝脂肘懸金印大如斗夫人女中烈丈夫臨
危脫簪佐軍需功成勞瘁歸黃壚庭前崢嶸啟鳳雛意氣
可封狼居胥少小已列執金吾當宁論功推第一溫綸特
許能抗逆四世均承一品封九原奕葉霑恩澤勒銘豈必

燕然山但磨崆峒一片石

夢遊惠麓吟寓題秦中承壽圖

偶讀夢遊天姥吟雲霓明滅清人心惠山一水頗不遠神
遊恍惚攀雲林中丞爲園惠山麓一丘一壑風烟足疊石
何須學平泉栽花亦不輸金谷蹈水之道元無私借泉干
山山不知山中汲泉日喧還何如一畝顯清池憶昔追隨
鳳臺下文章雁行等聲價一朝飛蟠不相及上下雲泥愧
同舍予已泥蟠三十秋君旣雲飛亦倦遊未老懸車慕泉
石翠微卜築成丹丘印累累芳綬若若何似名山對西郭
晏起那聞絳幘鷄和鳴不易華亭鶴兩兩青山郭外斜于

今勝槩屬君家吸泉已似金莖露餐霞不必飯胡麻君今
修我名園勝二仲無由陟三徑蹇予夢中成臥遊未得扁
舟一乘輿

松社歌贈程式言

君不見徂徠挺秀凌千冬含星漏月雲鶴從又不見岱宗
大夫留秦封盤根聳幹鱗作龍何如鼎湖之西桐江東一
丘靈秀存七松五老崢嶸入顧盼十峰紫翠餐芙蓉泠泠
足供陶貞白楚楚疑比孫興公翩翩公子麟之趾恍若謝
鯤披寒風捷足久躡遠遊屐九萬一息矜道充遙憐偃蓋
爲傾蓋太社群雅同觀空匡廬白蓮差可擬香山耆英將

無同詩成稍雲清藻外酒酣倒景華池中七松入社人亦
松相看一咲氣吐虹有時或發丁固夢還卜明堂推棟隆

小南州行贈徐君復

南州高士徐孺子名高東京已千祀後來之秀疑雲仍卜
築家園紹遐軌三洞雙溪毓地靈將令前賢莫專美始于
竹中結樓居渭川千挺應不如更喜坡邊布金粟淮南小
山遜芳馥桃花豈必疑問津井梧還候品泉人孤山尋梅
事如昨蘭亭修禊迹未陳籬邊秋英逞色澤池上秋蓮媚
松石探竒選勝歸自然心遠尤宜得地偏石家何必侈金
谷李相安得誇平泉只今負笈北遊燕黃金臺下好着鞭

試獻新篇應擊節龍門有榻不須懸回首家園謝猿鶴且
令蘿薜鎖雲烟

去貓詩

謝矣念我室多鼠提遺乳貓若乳虎須知種類出將門氣
勢應能破驕虜日隨饕餮給烹鮮夜逐溫柔得其所一朝
爪牙俱長成踰垣越屋似飛舞盤餐雖具不肯食時過東
隣逐其伍尾大身長信有徵那知顧復戀厥主汝名蒙貴
應厭賤謂我顏魯不足輔夏至猶微鼻端冷目豎于今莫
驗予豈欲表瑞朱泚軍抑將慕義北平府不知邪正將安
歸此行定當擇所處若還彈鋏歌無魚尚有青氈可眠汝

問交對

問予結交何所有爲言閉門尚嘉友逢迎不事號忘形坐
臥無妨得攜手飽德何須子平漿醉心豈藉淵明酒五侯
七貴與之疎松牕悲几爲吾徒彼我均爲世所棄白頭青
眼良不孤彼如無我東高閣我若非伊亦向隅彼雖從我
無所得我獨因之破岑寂翟門何必題貴賤鄴架元堪共
晨夕不同桃李向人門自與芝蘭在吾室須信神交卽石
交至聖無煩論三益

八月十二日五夜不寐感昔

聽罷城東漁鼓鳴纔聞隣鷄三兩聲支枕繩牀足殘夢窺

窓窓紙猶未明四十年前棘闈裏回首黜名一張紙于今
肥遯老明經豐草長林殊有情

墨苑歌贈程幼博

古來英賢負奇癖稽生之鍛阮生屐後此復見程鴻臚親
杵玄霜點膠漆老氏守黑應爾師楊子耽玄奚足匹墨成
進御天下知托名漁利市上兒豹囊繡橐盛裝飾中未必
有將誰欺凌烟自合画形容兩間萬象森奇蹤猶恐按圖
來索駿寧無葉公稱好龍我今未敢燒筆硯更欲臨池試
真贗嗟嗟月旦未可憑驪珠魚目從茲變幸君托名多名
卿已知墨守有長城後進好事倘得此肯許延珪浪得名

題蒼松晚翠圖爲李大司馬壽

徂徠喬松幾千尺，麗日梢雲添氣色。托根得地生龍鱗，作
柱擎天奠鰲極。任丘保傅司馬公，高標直幹訝許同天生。
李晟爲社稷，北邊良將拜下風。一行分陝勞王事，驅逐天
驕靖邊鄙。旌旗生色凱奏齊，開拓松山數千里。塞下久無
胡馬嘶，城頭惟聞烏夜啼。三邊不須擇鐵甲，九重先已慰
宵衣。分明斥埃罷刁斗，投石超距爭先後。當時漫擬城朔
方，四夷今爲天王守。熙朝画閣開麒麟，應作論功第一人。
黃金部下征蠻印，白玉腰間緩帶身。廟堂自藉瑚璉器，封
疆尤重長城寄。須知難老玉關人，定似蒼松晚逾翠。

壽太倉相公

常聞子晉吹鳳笙
縹緲山千秋空月明
又聞方平過蔡經
僊壇荒蕪留赤城
何如真人表東海
誕星澤物作元宰
九還大藥本無心
百歲童顏元不改
憶昔瀛洲登列僊
曾觀滄海變桑田
致君已見躋三五
應運還須名半千
庭前詩禮欣有托
膝下昂霄成象賢
世掌絲綸天咫尺
東山未許留雙屐
杞人有懷不敢陳
願言擎天須柱石

租稅謠

當時催租急如火
一半農夫化商賈
今日征商急于租
商賈又欲爲農夫
不道農家仍舊苦
况是商人無寸土
農與

商賈無一可只恐良民化爲虜君不見近來湖湘中男子
操戈女搖櫓

梓潼山歌贈黃大中丞

梓潼山勢何崔嵬逶迤地脉通登萊色映雲霞護齊魯氣
吞溟渤含風雷秀毓名卿負仙骨葉縣泥香丹竈畢分符
製錦已逸群佐郡專城更誰匹豈惟江夏讓無雙還擬穎
川推第一 帝簡長城萬里雄不須飛將在雲中折衝保
障踰秦塞緩帶輕裘存晉風聞道遼關欲偃武西北半天
藉開府九秋乘障息狼烟四野屯田成樂土占星已慰旄
頭落醞酒何須垂手舞大夫卽墨自應封恩詔春溫下九

重欲識龍韜就勲烈試看麟閣画形容

贈荅杜冠軍日章

鎮南將軍號武庫千秋耳孫繩祖武試看緩帶與輕裘
須知折衝在尊俎豈惟秉鉞作長城亦可操觚建旗鼓
好客應爲梁園歌驕胡好獻長楊賦朝驅猛將功不居
夜集詞人酒無數君家大夫亦非熊元功自合銘鼎鐘
解鞍雖倚崆峒劔捧腹尚夢徂徠松衆賢偏師已發軔
肘後黃金膺世封承顏林泉友麋鹿起草筆研生蛟龍
千里馳書訪岩穴不辭遙折夷門節尺素疑將榆塞雲
神交同醉吳天月開緘著述富琳琅應接不暇魂飛越
瑤華藻句旣陸離文

鎡彩幣何稠疊繩樞甕牖生輝光
巴人下里驚春雪知君暫息東山屐
還擬勲猷垂竹帛玉關須追都護蹤
金城更達屯田策勿言世無班孟堅
且磨燕然一片石

擬踏踏歌

踏踏歌人生百年如擲梭
虞淵浴日孰揮戈待河之清壽
幾何桑田成海揚白波踏踏歌
人生少年苦不多霜華侵鬢
奈爾何北印索索塚嵯峨長繩
大藥皆蹉跎

誥封旌節劉母胡太夫人壽什

朱明佳節開芳筵高堂絳節羅列僊
煒煌丹詔旌令節不獨青鳥將書傳
筵前獻壽稱難老趙升之桃安期棗
憶昨

嫁昌年最少春風三十離鸞早鳳去臺空遺鳳雛床頭日
夕泣呱呱人歸九原月沉鳧身成未亡愁向隅歲歲花開
與花謝年年擁樹空房夜暗風吹雨漏聲咽栢舟三復孤
燈下一朝雪後回陽春兒登朝列爲寶臣女歸名賢協鳳
卜赤綬方駕膏朱輪二氏相輝享駢祉榮章克棟行朱紫
車前振振御麟孫還能跳地作虎子豈獨問年稱古稀承
恩錫福從茲始

曾大母詩

西昌王宗肅風教坤貞篤生今德耀于歸占吉協鳳凰締
盟始受曾先廟先後事姑推婦順饗殮養志成叅孝一朝

藁砧貞疾恒籲天身代緘金籐誰云閨閣無姬旦千秋矢志堪爲朋冥冥天鑒許勿藥更錫寧馨兆封爵雖云風木令人悲還擬光榮報冥漠家門青紫漸崢嶸計日絲綸次第行須知聖主施恩日大慰賢臣念母情

大槐歌爲王戶部爾章賦

晉國三槐兆三公新城一樹將無同試看二王若一轍須知樹仁通化工新城避寇獲佳偶冰人乃出土囊曰玄舅臣跡差可倫馨兒世誼燕山竇大槐靈根自茲植縱壑昂霄幾千尺槐下作粥餉飢人後先鼓腹遊阡陌作善降祥能感神象賢繩武豈無人傳經不獨取青紫陽稱孝子尊

忠臣功名之際人所急以柳易播非易得克讓何如讓德
公後已先人化隣邑晚來高臥草玄亭好行其德推德星
年踰古稀協嘉夢上帝錫汝四十齡人仰大槐占福澤奕
葉重光雄地脉鶯語如聞子晉笙鳬來欲化王喬舄泰山
秦松五大夫張公大谷梨一株種槐無論三與一總之鬱
勃禎祥符誰云古栢能專茂還擬靈椿可同壽豈惟剪伐
戒于萌更許栽培在其後使君望槐思故鄉先君令德應
揄揚翰墨惟祈克使橐文鏹元不入行囊

題西溪春色圖

春光次第到西溪想像風烟勝灤西山色空濛迷鳥道泉

聲遠近亂鶯啼溪上何人寫春曉云是溪邊李遵道披圖
隨處是陽春行春豈必東山好

毒熱行

萬曆建極歲丙午南天肆雷煽大火紅雲布地可鑠金赤
日當天猛如虎彼蒼降殃胡若斯炮烙蒼生失其所千家
火井汲湯泉萬頃田禾麗焦土分明焚山迫介推又如暴
殫暴蘇武常年盛暑不浹旬不有清風卽涼雨迭夏迎秋
今匝月八十年來無此苦末由赤腳踏層冰空墜南薰開
北戶臨流莫恨我非魚此時江湖亦沸釜况乃負販誰者
子仰脅拊膺喘衢路固宜枯槁流汗人兒扶老翁夫哭婦

油然作雲是何時安得商羊一鼓舞

舊令江大夫挽歌

追惟桃源江大夫釋褐卽剖長洲符縣治稱雄等曲逆官
衙清白亦焚蕪豈惟文學飾吏治更以催科兼撫字戴星
勤課不言勞春風樂育成桃李乘暇時過野人廬劇談風
月愛清虛烹鷄茅客自奉母狎禽廣藻還停車是時百姓
愛官府鷄犬不驚賴慈母一朝鸞鳳易鷹鷂四郊始有逃
亡戶天曹右轉慰去思入宮早已妬蛾眉總是山濤應吏
部不妨砥礪甘士師士師詳刑走滇貴遠播皇仁在金
矢恩波浩蕩德意宣彤廷歸報天顏喜秋闈旣開主蜀試

拔尤幾空名下士聲價元高汶嶺雲品題欲鑑錦江水錦
江尚欲借餘波學臺簡命下鸞坡其柰休文衣帶緩不堪
賢勞并畏途膏車勉上巫陽路路入夔門沉臥病蜀計遙
傳至吾土兆庶驚聞罷春杵嗟嗟知己年株老千里無由
奠鷄黍試讀池上馴鴛篇不禁三復淚零雨計言著述可
充棟千秋之業尚在此君今已作修文郎堂上封公方壽
康只待衆賢鯤化日佇看綸綍發重光

寓題還青亭仍以松竹遠還青爲韻爲方侍御黃中

賦

大夫僊去存仙蹤青山常留大夫松月來不妨巢和鶴雲

起時見鱗生龍松間更有淇園竹有斐令人懷衛玉千頃
何須羨渭川一林還作箕畹谷信是地偏心亦遠風流想
見羣穠阮伏波大樹武侯桑貽謀歲月何嫌晚黃鶴一去
不復還華表千秋霄漢間故林依然無剪伐後賢散步開
心顏金谷平泉溷汗青何如人傑標地靈英豪奕葉光先
德只今誰數子雲亭

將進酒

主人浩歌賓起舞沛公分羨頃破釜千古英雄何足數君
不見周孔號稱大聖人同是青山一抔土

贈張子輝太學

開門下士逃世緣入門上客何翩翩千秋只合獻金鑑萬
選胡不收青錢言從關中過吾土橐裝寶劍雄資斧胸藏
三篋賓四門賦就萬言表三輔逍遙或跨江都鶴詞華亦
壓東藩虎昨來又向武林遊春風簫鼓漾中流六橋鶯燕
醉花柳淡濃覽結奚囊收回橈相期後予勝慚予龍鍾苦
衰病馳神惟應作卧遊擁雪那能掃三徑聞君舊里號鳴
珂須知養就丹山雛計日翱翔向天闕絲綸奕葉贊詩謨

送張戶部復命還朝

君昔寧親出綸閣倚棹江臯訪林壑君今挺節董邦課商
旅出釜頌聲作席門孺子自長貧厚祿故人情不薄賙貧

豈必渙王居行德惟分祿所餘亟餽每令瓶有粟數年不
患釜生魚入春屈指瓜期及一曲陽關動行色素中寶裝
微陸賈囊底新詩富長吉長河千里雲帆開知君簪笏上
蓬萊文鏹入帑天顏喜會聽虞絃歌阜財

過門老百四歲寄申問卿

朝來一老門前過問年百四尚能步令君憐之賜寄食獨
憂無衣禦風露旣無須賈解綈袍又無廢范致五綳好乞
希文請麥舟庶幾得免號寒苦

唐清卿伉儷偕壽

傾蓋班荆感疇昔握手論交締膠漆驚看野鶴起雞群立

見長松數千尺君家世德擅斷輪一舉掄魁弁絳披謚云
天路隔九重釋褐金門仲舒策崢嶸感稟邁凡流翱翔霄
漢通仙籍半生韞玉七十齡九列橫金二千石留都吏隱
亦宦遊一辭不合營菟裘歸來松篁間家室鹿門烟月成
丹丘華堂偕老喜難老此日霞觴稱壽考星輝寶婺照綺
筵花發金萱茂瑤草恩綸寵錫代絳絲五鳳傳書作青鳥
瑤盤奉案眉可齊豈若漢世太常妻詩詠宜家易正室唱
隨琴瑟和天倪唐侯驕驕昔稱美車前孫曾盡千里象賢
繩武何足難計日芬華起青紫朝來西山爽氣凝已知壽
域在毗陵山謠一闕頌繁祉川方至今日方升卽今從橫

廣雅集卷之一
擬國是老成定見須君事好作磻溪柳釣翁勿謂在山爲
遠志

龔憲使伉儷同壽

晉陵紫氣凝高城華堂邀歡百福并堂中朱紫重珪組渤
海循良今少卿當日詞林重聲價雄文剗厠追班馬禮樂
百年鸞鳳儀雲霄萬里鵬鵬化三冬已知足萬言大廷對
策着先鞭爲郎出守久敬歷賢勞今德推勤宣江右滇南
各分閫英標碩碩畧輸忠藎華封三祝效千秋一旦思萬翔
萬仞官偕三揖列崇班遠志不須仍在山中庭群玉習詩
禮東山雙屐開心顏更喜中閨有仙偶稱觴均進瑤池酒

攬轡當年稱內君，懸車此日推良友。
歛華荆布德耀同，塵門烟月齊高風。
箕疇五福先眉壽，海屋一籌綿歲功。
綸綍輝煌表坤德，應知內助供臣職。
難老松筠慶有餘，不言桃李偕端默。
花映橫金色正黃，登高令節值重陽。
南山莫罄冰清頌，詢言玉潤在東床。

送俞君宣會試

憶從君家賢大夫，升沉已判誼不殊。
大夫未老忽仙去，伐木一聲山鳥孤。
既見象賢心獨喜，且聞敏學攻經史。
清白依然詩禮存，籍籍賢聲滿人耳。
朝從文社務逸群，夜讀然藜更漏分。
遠遊欲觀稽古力，賢關負笈廣見聞。
一朝拔俊

收奇寶槐黃虎榜登名早三遷不負倚閭親一飛直慰通
家老男兒事業紹箕裘鳴鹿先歌桂子秋計日皇都春色
好曲江策馬杏林遊

楊倩若弄璋歌

有客昔過華陰山困雀逢之振羽翰黃衣自謂西王使報
德酬恩呈白環且言子孫世清白關西夫子通經籍豈惟
名德冠東京四世三公衍芳澤綿綿瓜瓞已千春荏苒功
成告老身一朝當宁存耆碩九重渙汗傳綵綸祗啟後人
總時彥象賢此日登金殿文孫翩翩更逸群掄才應入瀛
洲選蘭房徵夢協熊羆孔釋抱還麒麟兒滄海蚌珠光照

乘藍田種玉輝門楣黃衣白環應再得誰謂古今不相及
南風莫惜報都門好爲曲江花助色

吳母毛太夫人獻壽歌

延陵世德綿千秋碧山學士諧好逯毛公女孫秉坤德家
風奕葉聞睢鳩昔日嬪風樹賢婦此日慈幃介賢母祿養
翻成却老方恩波釀作長生酒膝下崢嶸號卧龍臺端丰
采推乘駘又聞東昌典雄鄉聲華不遜黃與龔扶搖次第
河東鳳計日登庸作隆棟碎雍兩賢更逸群千時欲獻賢
臣頌詵詵羣孫三十餘當時湯侈太丘車賸見詞林推繡
虎已知腰下懸金魚更喜生辰近長至榮光自是清門事

玄酒堪稱百歲觴
書不獨三青使堂上
金萱榮古稀天
中寶婺發遙輝
四壁絲綸耀金碧
不藉班斲舞綵衣
西王之桃安期棗
共入雕盤錫難老
一水相望風引船
人間信有蓬萊島

壽姚公理時客江都

憶昨暮春風舞雪
翩翩白晷偕詠歸
自君浪戾江南北
契濶于今躋古稀
流寓維揚藉通顯
向人猶作青白眼
懸知腰纏跨黃鶴
尚可蓬瀛見清淺

河陽別業六詠為潛朗叔壽親賦

下山崔嵬映茗水
一曲烟光漾青紫
千年玄鶴應來居
帶

月巢雲鳴和子朝從南極親紫微夕與寶婺爭光輝城郭
人民共綿邈不數遼城丁令威

右鶴來居

淮南小山開桂藂門前有客來八公雪川桂堂自無隱芬
芳賸有河陽風堦除壘石作巖谷坡陀硯礪儼浮玉傳書
何久下青鸞扶輿自侈駟蒼鹿

右小山堂

曾聞幽人竟陵子擊木徘徊隱村里著經應先顧渚茶品
泉定首金沙水君今茶寮構家園手烹蟹眼進魚軒甘露
一杯傾玉液清風兩腋入金門

右茗柯館

高樹千章蔭長夏高閣層檐翫鸞尾一厨名畫頽凱封萬
卷奇書鄴侯架閣中作賦金玉聲檻外萬籟相和鳴有時

司作鈞天夢直作虞廷聞九成

右韻閣

有斐曾聞詠淇澳虛心直幹人如玉名齊六逸邁七賢萬
竿何必簣當谷湧言幽谷似簣簴結實還堪餌鳳皇翠袖
凌寒時徙倚龍孫欣見欲成行

右竹林園

東齊雪宮浪得名西域雪山空著聲何如惠連成賦後四
壁照耀瑤華生俛仰無妨偃卧客荏苒洪鈞轉陽律歲寒
堅白保貞心不與梅花鬪香色

右雪苑

題支硎佛臘圖

寂寂支硎自林壑年年佛臘傾城郭百船簫鼓爭喧譁上
下肩輿競歡譁青驄游冶行歌斜紅妝女兒向金沙猶

喜談禪修散花寧知水月心方淨慧眼觀空消物華

苦秋熱

望秋風雨如冬月倏忽經旬苦炎熱披襟不得襲口風攢
眉空憶天山雪秋荼日夕不肯休大火何日當西流豈是
司天爽纒度誤以重離爲辟收

題五清圖贈王大司馬

大樹將軍孰方駕三槐名門大司馬輕裘緩帶作長城悅
禮敦詩尚風雅金城長策奏屯田銅柱勲猷播夷夏四知
不視關西金一介尤嚴有莘野陳君能事四座驚濡毫點
染應徐卿寫生傳神逞三絕酬恩比德圖五清楚畹洛川

兩冰玉蕊之歲寒三友生須臾長幅集群雅還采朱房同
效靈裝璜緘寄授捷足北望遼陽迷黃鵠到時解橐獻轅
門虎帳披圖秉銀燭憶昔軍將來叩門開緘光霽承春溫
寐歷蓬蒿忍生色至今猿鶴猶唧恩豈必馳書留趙壹已
知此馭屬王尊宵旰無廢士民樂千里飛蟠任酬酢封狼
屠胥會有時定見丹青上麟閣

漢陽酒仙歌爲蕭封公壽

漢陽儒人如列仙疑是梁皇雲仍隨世緣百觚千鐘追往
哲葆真抱一知酒全飲中八仙應有九高門廷尉合歛手
由來斗石醉淳于一任春江釀春酒須知世有獨醒人兒生

應作虞廷賓弱冠成名騁高步曲江策馬雲霄路終軍漢
侈請長纓陸機安得誇文賦通藉分符宰平湖釜魚鼈
似萊蕪瞻雲極目楚天碧政暇樓成名弄珠珠今遠照
未老偕隱鹿門烟月好次第生辰共百年均沾綸綍光榮
早龍臥漢陽江上雲芝榮鸚鵡洲邊草自信益堅當益壯
惟有榮名以爲寶君今已作尚書郎南臨使節鹽餼糧競
競夙夜王供重茹蘖飲水遵義方書寄高堂之甘羶聊采
吳歛稱壽觴酒仙不復中賢聖長吸大瓢玉女漿

唁陳省元居一

君昔探親脫輓轡寧知海岱爲羸博明年復作探親行親

雲已化遼城鶴夢中訪戴漫勞神一水相憐信未真極目
瓶山芳草綠不禁饒酒哭青春

五言律

送趙明府入覲

釋褐重連城，彈琴早著聲。
試泉占井冽，敷政協山名。
向關鳧成局，歸朝鶴和鳴。
行看錫燕處，醉聽上林鶯。

飲酒

酒熟惟自酌，客同誰舉觴。
獨醒人所訝，取醉亦何傷。
笑傲應難寄，形骸未易忘。
須知臣已老，不逐少年場。

斗室

斗室不言陋，端居聊率真。
客來惟膝席，身下卽親人。
酷暑能消暑，嚴寒可借春。
偏宜幼安榻，坐臥足怡神。

除夕立春

時序方除舊流光忽布新須知今夕臘已換隔年春燭引
梅風入寒催栢酒頻栢棧遺口澤對此一沾巾

春日散步

謝氏登山屐陶公漉酒巾相看泉石意偏適薜蘿身柳色
催春早鶯聲出谷新閑心宜物候不似宦遊人

蔣都閫別號菊梅道人爲賦

十年辭建節三徑老干城倚杖籬邊興巡簷物外盟黃金
邀緩帶白雪起新聲得意應忘象臨流好濯纓

念星兒佞佛天竺

壤子武林遊乘春一葉舟湖光青嶂合風物錦囊收目觀
諸天盡心香寶地酬登高望親舍雲白是長洲

苦雨

花事應過半招尋苦未申絕憐經月雨斷送一年春田畝
村村澤街衢處處津祇令賢守令感額問貧民

新月喜密至

久矣甘岑寂寧知喜足音不因新月上安見故人心餘興
慚河朔狂踪擬竹林誰爲名南呂無俟叩商琴

自遣

致用成堅瓠逢年笑石田乾坤留長物伏臘度餘年方內

元如寄壺中自有天達觀俱傳舍千古一遺編

七夕前一日立秋

敝帳涼颼入空堂宿雨收雙星猶待渡一葉已知秋
河影織雲亂螢光大火流孤懷驚物候巧拙謝人謀

夜酌

閒身成濩落斗室足徜徉原憲貧非病寬饒醒亦狂
羊腸太行道鷄肋少年場往事那堪述挑燈一舉觴

送王文學入京謁江大理

殘臘返西京乘春又北征黃金臺自在白雪賦將成
交廣書郵重家貧行李輕須知漢廷尉結襪有王生

贈米二尹表弟

已謝陶潛米曾無陸賈裝
塞翁應失馬岐路任亡羊
漫說青氈在空憐白髮長
天教留敝榻跌坐讀蒙莊

壽絮泉和尚端陽生日

大觀泉洗耳真覺絮沾泥
一自出家後無妨與戶齊
法輪迴佛日經榻轉菩提
我欲逃塵累東林學杖藜

自警

一夢未爲短百年非是長
鏡中窺白髮枕上識黃梁
世態日以遠機心久欲忘
祇應穿榻處跌坐炙名香

聞湯義仍改教

通籍已愆期栖栖尚路岐
漏心應少望拙宦莫嫌遲
五千腰雖折三鱸鬢已絲
江干渺雲樹握手是何時

勗宿兒

得失勿言命特來當有春
數音應類父不偶亦由人
前路卽捷徑迷途好問津
羨魚須結網無事漫垂綸

督學趙師祀三衢鄉賢

化雨遺吳會文星繫斗牛
勲名垂宇宙俎豆祀春秋
聲價連城在儀刑廟貌留
江山鍾奕葉知欲紹箕裘

得家志喜

良月以途聞孫枝又得雄
祥光麗弧矢餘慶協熊羆
再索

知兒喜重支駿祖同祇應命醇酒邀客醉和風

贈朱郡理

朱穆自貞孤乘軺試理吳不宛如定國勿喜作陽膚擬議
持三尺將明籍兩都清光燭幽隱寧數魏王珠

顧世戲辭日者

混跡避虛名陶然無世情烟霞雙屐穩雲月一身輕妙舞
梁間燕新聲谷口鶯榮枯豈吾事不必問君平

贈謝文學軒伯

白晝自琳琅清輝照画堂詞章青玉案標格紫羅囊乘月
來吳會歌風類楚狂請君題柱去前路有康莊

贈別謝三甫秋官

釋褐入金門憂時早叩關九重千里隔萬死一身存微罪
非臣意生還亦主恩賜環應有待且莫問乾坤

題唐二府榮封卷

陟明熙代重褒德楚材先玉樹孤標出金門異命傳除書
釣五馬世德應三鱣壽梓當虛左綸音自九天

中秋懷仲氏客金陵

佳節值中秋憐伊白下遊蟾枝虛素鳬雁影落寒洲世態
須懷刺霜威莫與奏一杯持顧憲何以慰兄酬

中秋無月

中秋信宿雨門徑鎖莓苔欲問青天月空停白玉杯雲迷
蟾窟香夢入廣寒回何日西山麓斜陽爽氣開

贈鍾羽修

之子嘉禾彥高標等竹林才情述詩品山水寄琴心彩筆
生丘壑金門可陸沉慚予離索久三徑負幽尋

王克仲山居誕辰贈之

短簿發雲仍長明仿佛燈巖居非避世市隱却隣僧送客
追三笑聽經悟一乘稱觴乏肴核惟有酒如渥

席上分詠得車

虛左誰迎客乘軒自尚賓獨憐投轄意疑是脫轡人漫說

朱丹轂何堪蓬累身空勞勤勸駕中道已埋輪

卜築丘歌館二首

鷄息豈無地菟裘晚更營數椽紆遠性半畝適餘生
夢艸池塘近看花棣萼明黃鸝交坐處應解和新聲
跡寄巢林鳥聲慚抱葉蟬松筠宜野性甲子紀流年
地較巖居近心耽市隱偏浩歌陶物慮無俟學逃禪

題老子出關圖

青牛方稅駕紫氣正臨關秘籙虛空外眞傳想像間
可名神是谷無物氣爲山拭目華堂上應知見一班

聞松陵賽社遇雨二首

松陵催賽鼓通國若狂人靡麗雖可悅豪華已喪真樂神
雖有事作偏豈無因莫訝連朝雨相爲洗俗塵
烟霧障垂虹翻成羅綺叢瀆神應致雨眩俗自從風漫說
千金費都歸一擲中如將充廩實猶可代年豐

賦得雲谷贈陳丈

小隱賁丘園傳經桃李蕃雖無推轂彥亦有御車孫谷靜
神逾王雲閑意自存如承蒲帛命猶可對臨軒

雨後登虎丘

近山惟七里不到又三年偶赴花前約來追石上緣
雲作閑暝色林生烟試躡謝公屐應慚步昔賢

病齒禁酒試顧渚新茶

禁酒已經旬形神殊不親松醪惟欸客桑落祗娛賓漫憶
高陽侶誰憐獨醒人末由破孤悶猶喜渚茶新

感事二首

動地波翻海憂天客向隅貂璫應自貴狐鼠更難圖竭澤
誠何忍揭竿良可虞作新如有待拭目望來蘇
閭閻深積憤里巷奮狂呼兵豈潢池弄民須渤海蘇自諳
葵衛足無藉雁啣蘆賴有龔黃在群疑始脫弧

庭際秋容燦然志喜

秋色遍南牆盈盈蒹晚粧花神開處笑艸聖酒邊狂漫說

題紅葉重論睡海棠時疑降王母衫袖舞鵝黃

聞有欲以專席見迂者惴而賦此

江潭醒正則斗石醉淳于信是清狂客何堪禮法拘興來
詣下座歸臥晏泥塗漫道能虛左令人欲向隅

紀夢

蝴蝶元成夢芙蓉別有城潭香侵鼻觀樹色動心旌桂女
持花入芝章擁蓋迎覺來驚聽鼓回首是蓬瀛

入春多雪

春意似將闌猶疑臘未殘穠陰仍釀雪病骨不禁寒草色
迷沙漠禽聲凍紇于須知僵臥者訪戴亦應難

春寒

春入已經旬寒威尚逼人江梅方韞玉堤柳正含顰採藥
惟供病烹蔬自食貧輕衫應可御未得解懸鶉

送申晦之取解北雍

花發渡江梅雲帆向日開橋門迎玉樹館閣識珠胎魏闕
新交泰燕山舊築臺絳綸應世掌知爾奪標回

鄧水部生祠

北闕傳新命南陽試一麾江山留勝槩堂構祀雲司肖貌
垂身教題銘出口碑勲庸儲竹帛不獨在萊祠

題道士雙鶴

逸興類華陽閒庭白鳥翔不須遊赤壁亦可夢玄裳物外
忘年侶壺中卻老方逍遙遺俗累端坐理蒙莊

雪後陪于文若蕉園觀劇于善画適仲氏不至

歲晏寒雲合名園暝色移共憐歌和郢無俟仲吹簫戶入
冰壺影山留玉樹枝傳神藉摩詰殘雪積蕉池

獨坐擬裝潢文太史烹茶洗硯圖自遣

獨坐亦云樂羨之一卷書避烟寧有鶴吞墨且無魚研洗
清泉汲茶烹宿火餘爇成太史画儘可賁吾廬

賁酒僧家不果

偶讀山中賦思叅上乘禪難忘元亮興未了遠公綠花雨

迷青眼香臺障白蓮從知無量佛不是飲中僊

贈別陳少府

屈指金陵別蹉跎歲月遙歸吳應訪舊入越亦乘潮聲價
仍驚座年華已杖朝暫來還欲去惆悵倚蘭橈

懷李本寧

昔年開短徑車馬過長庚遙憶山河外空懸霄漢名居廬
新讀禮戀闕舊題屏尺素無由達心隨雁北征

張節婦

合浦別雙珠韶年獨向隅未亡餘一死努力育二孤展鏡
悲鸞影登堂擁鳳雛如聞栢舟詠應不媿遺模

感昔

憶昔愛園居悠然習氣除
夢回猶是蝶客至孰非魚
依隱疑玩世窮愁聊著書
流光駒過隙轉眼廿年餘

顧尉甫得子

陸閭報懸弧徵蘭再索符
藍田已種玉合浦復生珠
跳地作虎子來儀占鳳雛
須知顧雍後次第紹雄圖

送陸坐營遷鎮嶺南

樞府慎掄材符隨陸抗來
移營辭細柳度嶺值寒梅
羽檄軍聲震羊城劍氣開
拊髀知有待還擬上金臺

客以錢潤筆謝之

赤仄元稱重青缺久著聲勞君阿堵物過我孔方兄和嶠
能無癖蕭宏浪入評筆乾差可潤聊足慰貧生

達觀二首

往事感乘除無煩論有無弓亡何必楚劍掛豈歸吳漫詫
蓮城璧虛談合浦珠棄瓢君莫訝莊叟亦音徒

歲月老窮途無論缺唾壺葛洪勾漏令阮籍步兵厨長物
歸新主浮生一故吾平泉舊花石曾與後人無

贈僧

祝髮入楞伽空門度歲華翻經申五誠說法演三車身作
沾泥絮心隨落溷花不耕能足食疑是飯胡麻

寓感

安石登山屐林宗折角巾時清應得歲花發又逢春心懶
爲形役交憐與故新乾坤留長物偃蹇任陶鈞

自慰四首并示宿兒

遯世可無悶忤時非所宜山樗還藉老籬菊莫嫌遲舐犢
從人笑下羊亦自疑浮雲總蔽日不瑣達人肩

失得遵勿恤簡編聊自娛任言爾栗犢不作名家駒長夢
笑短夢小巫嘲大巫人生半岐路何事泣楊朱

損益宣尼鵠雌雄老氏谿榮枯多塞馬代謝一醢鷄知足
身無辱觀空物可齊卽卽夢破後不遣客心迷

白賁元無咎青蠅亦未妨不知榮二鳥一任說三臧午夢
酣經筍春心冷革囊須知跌坐處土室總康莊

冤文詩

不有無私牧誰明不洗冤兩姑難作婦三尺易平反雷電
仍懸鏡幽冥啟戴盆還應歌楚些并慰未招魂

七月杪喜雨

酷暑已漸去清風時一來長林斜日下踈雨片雲催天意
甦溝壑農功慰艸萊呼兒開宿釀莫惜罄深杯

楊子雲

玄艸徒爲爾青蠅已失身西山雖未餓北海可垂綸

咸思漢諛詞獨美新寧知投閣者卽是解嘲人

坐對寒月

野興樽中適閒情物外求後凋三徑竹不繫五湖舟機息
愚公谷貂存李子裘無邊歲寒意烟月小窻幽

送程式言東歸

獻玉苦不售泣珠應自憐鄉雲千里望歸思一帆懸傾蓋
誰推轂通家願執鞭承顏在今日轉眼卽三年

解客嘲

有客向予說蒼生奈爾何非無推轂者自愛接輿歌野鹿
耽泉石冥鴻避網羅夕陽對尊酒時一聆庭柯

誅夢

夢自身中出身仍夢裏人芙蓉八月雨蝴蝶滿園春欣戚
元無着榮枯總未真大都變幻處非想亦非因

長至

閉戶謝招尋迎長守故林屈伸自相感天地本無心七日
占來復一陽知始臨不須愁歲晏閭里足浮沉

歲暮

順事已無情偏堅物外盟烟霞銷短景泉石許長生白眼
三千界虛聲十五城亦知歲遲暮猶可待河清

霜降獨酌

初驚一葉落又聽九鐘鳴
時序隨駒疾秋容逐候明
殘編供坐臥委徑謝逢迎
漫自中賢聖無論濁與清

懷周兆通

負笈向誰邊風霜應自憐
聖門虛過魯仗策復投燕
蔡澤雖無相馮唐已有年
故園松菊在何日着歸鞭

吳民謠贈姜將軍兼呈曹撫臺

中丞開憲府選將得干城
畫一臺端法無雙幕下名
烽烟清紫塞衽席臥蒼生
保障功成日絲綸錫玉京

甲辰人日立春

時序日逢人條風始發春
亦知年歲暮偏喜物華親
綵剪

千花艷莫添七葉新願言寬大令早晚布洪鈞

顧叔起下第南歸唁之

夙駕飛殘臘適歸已暮春忽成千里別動作隔年人長揖
辨明主承顏慰老親迢迢君莫歎花徑且埋輪

前九日寒作

是月十四日
始交九月節

嘉辰自重九節序尚中秋忽爾行冬令催人檢敝裘荆花
已零落菊徑且夷猶漫瀉一尊酒聊傾百斛愁

解嘲

老去謝逢迎由來無俗情烟蘿足軒冕巖壑卽簪纓自許
機心息須知世味輕本非爭席者何事海鷗驚

曲水艸堂

上巳可流觴誰憐舊艸堂
遺城已化鶴岐路合亡羊
月冷虛無鏡雲迷何有鄉
長林響樵斧春艸綠池塘

懷幼聞

張緒自翩翩音容忽杳然
當杯稱莫逆握手許忘年
繩武豈無地修文獨喪天
何時埋玉樹揮淚酌重泉

送洪掌教擢宰京山

推擇屬循良分符宰帝鄉
角陵天近漢雲杜水連湘
斗轉三鱸地琴鳴五客堂
懸知政聲起不藉郢歌揚

和荅許覺甫

寂寂掩柴門
交知罕見存
因君評月旦
令我感寒暄
看竹元因主
尋花樂問源
高吟應抱膝
烟月滿江村

奕座書寢解嘲

諸君坐隱處
老子夢遊初
勝負叨先著
縱橫喜自如
臥堅成墨守
神定卽華胥
四座誰尼父
安能責宰予

聞笛

何處吹長笛
令人感歲華
聲聲怨楊柳
字字落梅花
月送龍歸海
風迎雁度沙
祇疑桓叔夏
隔水下香車

遙挽

昔作逍遙客
今爲溟漠君
王孫千里思
神鷗族一丘
墳月令

烏啼夜雲孤吊鶴群好尋羸博侶莫讀李翱文

和韻贈荅杜將軍日章

知君思報國攬轡志澄清已作三軍帥猶耽二石名敦詩
如卻穀結客識韓荆莫學長林叟生平無宦情
祖烈千秋重新詩四遠傳聞中聊染翰塞上可披堅試艸
陳琳檄無論范蠡舡相望不相識傾蓋是何年

釋傲

身賤應屈膝病多慵折腰安能謁尊顯第可狎漁樵門外
無題字風前已棄瓢何勞訝巢許猶未識唐堯

謝徐許二丈惠新米

七月纔過夕朝饗喜食新須知授粢意特慰老年人甘入
餐霞口香分飽德身絕憐荷鋤者多未試沾唇

秋晚獨坐有懷

風雨重陽近葉更已着花空齋成獨坐秋色在窓紗搖落
驚時序衰慵感歲華素書應在壁賓雁落天涯

感物

委徑瓊蕤苦扶筇自往來閑參無量壽甘老不然灰柳待
春風拂花須淑氣倦鷓鴣指腐鼠鷹隼莫相猜

自慰

禁酒非干病烹蔬爲食食益堅薑桂性方適薜蘿身彭澤

瓶將罄菜蕪甑欲塵所欣香茗供猶可任吾真

寄趙玄承

趙壁應無價隋珠尚暗投追惟同舍日却憶帝城秋
命也臺卿志時平平子愁因風歌伐木何以慰相求

苦雨四首

陸地成汙澤高原化水鄉何時吠蜀犬連日舞商羊
屋漏疑營窟城危懼復隍下幃人不作誰爲縱諸陽

長夏雨漣如濃雲翳敞廬建瓴簷震尾沉甕釜生魚
桑土鳩巢拙泥封蟻穴踈祈晴賴良牧何以慰居諸

晨夕雨連綿庭除可泊舡決排思禹績澤水警堯年
陸海

隣爲壑窮堤土塞川民魚祈拯溺號泣向旻天
雨師宜稅駕民瘼已膏肓對泣都成楚篇霖豈是商漏天
虛覆幬無地暴衣裳所藉旋乾力震心亟禱蒼

舒嘯閣

高閣一登臨冷然物外心成公金作賦叔夜竹爲林水落
魚龍聽風清鸞鳳音蘇門應不遠無俟更招尋

立秋前二日驟涼

昨朝猶袒裼今日欲披裘何物頓銷夏先聲忽變秋炎涼
門外客晴雨杖頭鳩寄語二毛者無煩感蓍莠

白髮

白髮老雲林寧知隱漸深
滄浪無擇水梁父有餘音
星聚床頭劍風吟壁上琴
不須咲巢許猶未達堯心

寂寂

老眼轉摩娑無能遣睡魔
窓虛蛛結網門靜雀窺羅
舊雨塵懸榻新交壁掛梭
晨昏無可語寂寂奈愁何

秋思

三徑任沉浮衡門景物幽
病軀方驗老衰髮不緣愁
秋啟蟬聲早螢迎大火流
孤懷慚益壯彈鋏負吳鉤

燕賀芝生夢趨朝作此自遣

顧我已衰齡兒曹媿寧馨
同甘澆白屋安敢夢彤庭
簷燕

疑來賀園芝似效靈盈虛隨所尚閑戶讀殘經

樂歲

鼓腹頌堯天歡逢大有年桔槔無所事高下足于田萬寶
登場早千艘入貢先何憂糊口計取給杖頭錢

春夜寒甚

春寒寒似臘破被夜床半微火成京焰空幃作紆千有衣
貧甚雨無雪卧袁安挾炭融融者寧知行路難

悼張金粟二首

君年方半我一病忽膏肓羣玉應歸府修文合作郎見垣
鸞扁鵲顧驥惜孫陽松抱憐才意無能莫一觴

與君十日別忽作九京遊
楚些悲冥漠梁園失應劉
青雲豈無路白玉已成樓
賴有季方弟遺文幸可收

枯坐

歲月閒中度烟霞物外偏
焚香非佞佛面壁類逃禪
解凍風猶惡驚寒柳未眠
寧知枯坐久當膝榻應穿

贈僧

祝髮入珠林松筠一徑深
長明開覺路清磬下幽禽
貝葉無生偈蓮花不染心
欲驅肩膊上豎且食鉢中針

韓上醫翼鶴寄神鹽竒驗賦謝

吳市有韓康通家忝雁行
儒門應種杏客舍遇長桑
業自

傳三世垣應見一方上池分半滴猶可潤枯腸

聞本寧留滯維揚

曲水御杯日維揚禦侮時遙憐鴻鵠侶與感鵲鴒詩人事
行藏換天涯歲月移相將雙綠髻俱作鏡中絲

原正憲副予告贈之

稽首拜章餘欽承帝簡初丹心應戀闕青髻擬懸車懇
疏辭三命高風仰二疏天留癡叔在偕爾狎樵漁

送顧仲默北征

凝絕自堪紀宵征何足歎不躡遠遊履寧知交讓冠束裝
辭故國負笈入長安前路逢知己應忘行路難

哭長孫陽初八首

痛哭哭青春那堪皓首親吞聲花落溷喪氣桂為薪缺陷
人間世虛無夢裡身箱書非郗氏何以付門人

父倚克家子祖憐繩武孫一朝成異物數口泣衰門火折
將飛劍神傷未了恩鍾情惟我輩腸斷不須猿

衰年淚易盡哭死眼先枯那可相為命無端失故吾虛勞
座上客頻訊掌中珠脩短雖天定難禁數向隅

童年知稼穡晚景藉菑畲易散雲歸壑難逃天喪予伶仃
二豎後冷落五車餘不盡幽明感寧容惡抱舒

青山埋玉樹白首卜黃壚已碎相如璧難還合浦珠和鳴

成化鶴及哺感啼鳥待盡應吾分知伊不父孤
死別已一月寸腸猶九迴修文入天路繩武隔泉臺衣有
懸鶉在人無化雀來那堪將禁火淚洒不然灰

生意既已盡死灰寧復然空懷請纓氣不待棄繻年影落
塵無地神歸何有天輪迴揔冥漠難卜再生緣

一室忽號咷游魂不可招西沉隨落日東去逐歸潮未化
為龍竹翻成覆鹿蕉老懷易生感無計棄莊瓢

查節婦

桃李失青春無言白髮新月沉傍死魄鏡老未亡人衾影
俱無媿幽明不染塵須知心匪石寧化望夫身

原缺

五言排律

過黃仲華宅觀牡丹

春盡邀新賞，初晴覽物華。
偏憐徵士宅，重發故年花。
灼灼中庭見，盈盈拂檻斜。
香仍江夏澤，色借赤城霞。
對此應歌郢，因之欲舞巴。
縣花雖在望，那得比君家。

宿兒生男志喜

時序將逢夏，韶光尚借春。
欣傳種玉地，已免得雄身。
一索還仍震，三芝足慰親。
敢云雛是鳳，聊誦趾成麟。
善慶流風舊，書香兆日新。
呼兒開瑞露，吾欲燕嘉賓。

哭吳次公恭先

屈指三吳彥誰當千載人追惟傾蓋日猶是下帷身豈獨
經生業還應國士論郊原麟趾見霄漢鳳毛新意氣超先
進文章婉後塵數奇嗟十上一諾自千鈞腹以藏書富囊
因濟困貧窮當稱地寶達可作天民安石登山屐林宗折
角巾逃名耽却掃抗志樂埋輪松菊陶元亮烟霞鄭子真
恩綸虛寵錫初服晏儒紳杜甫堪題栢莊生合擬椿齡
雖過曆上壽亦宜臻起起符玄夢悠悠出谷神空慚一日
長未卜再生因蟬蛻人間世琴亡席上珍計聞先有淚泣
盡竟無申國學彫三老邦侯失大賓隋珠曾照魏趙璧不
歸秦几杖辭蓮社綸竿冷渭濱閨幽需史筆猶可貢貞珉

吳江劉明府考績分得泮池芹藻

理劇藉嘉謨三分鉅邑符出山仍遠志照乘卽明珠金斗
初棲鳳同安再起鳬行時爭借寇到日慰來蘇政績傳三
輔恩波浹具區除兇先去稗肅紀邁鞭蒲實刻明霜鏐清
冰澈玉壺移文堪徙鯉易俗驗投巫赤子仁聲溢青衿化
雨俱三章惟畫一獨立不言孤愛士勞匡直勤民問有無
門牆感桃李川澤靜荏符疆幹雄吳會勤宣播帝都須知
芹藻上真足範群儒

送曹撫臺移督河工

掌憲臨三輔勤宣庇百城移風見不變更化協群情幕下

無雙士臺端畫一名桂持銷竊發閭里慶豐亨若保甦民
瘼如綸下帝京堯憂咨岳牧禹績待平成水土仍開府
河渠屬亞卿一身當砥柱千里報澄清粳稻雲帆入倉塲
玉粟盈夾排恢極溺匡濟俟持衡渡虎疑同漢登龍幸識
荆片言揚側陋一顧起虛聲解左叨延越伸知敢望嬰末
由從惜寇咄咄眎飛旌

壽郭封公

家風承有道眉壽啟無疆報國輸忠悃趨庭得義方八旬
延島使五命錫鸞章帶礪勲庸重照綸闕闕光仙人神鼎
饌玉女帝壺聚排闥青嵐入當車紫氣揚書標家是政

詩詠壽而康
雙屐扶藜鶴羣
環繞鳳凰杖
朝知有日猶可
酒君王

李明府龍華樓前見過卽席奉贈

片玉出崑岡
驪珠奪夜光
學成經作笥
身出智爲囊
驟馬方蹄醫
鵝雛且伏藏
扁舟返桑梓
劇縣失循良
興致陶雲月
聲華重廟堂
幽尋勞杖屨
高論露干將
勝侶期莊惠
清歌刻羽商
烹鮮充俎豆
岸幘亦冠裳
萱葉探春早
梅風引座香
忘疲愜深酌
鍾漏未相妨

贈潘朗叔

弱冠象賢身
翩翩自出群
紫駟千里足
白鳳一毛新
北斗

家聲重南陔子道申珠胎出幼海寶筏入通津綵霧文成
豹祥烟趾是麟卞山開氣象若水毓丰神道以忘年合交
緣世誼親提躬重金玉持論發經綸一息才應老三冬養
益醇異時簪魏笏祖述舊垂紳

送楊明府伯玉赴任始興

歲寒憐舊雨春色動宵征別感江淹賦花催庾嶺行一官
聊發軔七里足垂聲叱馭心方壯鳴琴政自清毋嫌五斗
薄定振四知名誰謂金門遠行看入帝城

處實堂後集卷之一